

四庫全書

集部

欽定四庫全書

集部

宗子相集卷一至四

詳校官監察御史_臣陳化龍

侍讀_臣孫球覆勘

總校官原任中允_臣王燕緒

校對官編修_臣閔惇大

謄錄監生_臣楊仁基

欽定四庫全書

集部六

宗子相集

別集類五明

提要

臣等謹案宗子相集十五卷明宗臣撰臣字子相揚州興化人嘉靖庚戌進士除刑部主事移吏部文選司進稽勲司員外郎以賄楊繼盛忤嚴嵩出為福建叅議遷提學副使卒於官年僅三十有六明史文苑傳附載李攀

龍傳中蓋攀龍徐中行吳國倫梁有譽及臣
有五子之稱也朱彞尊明詩綜稱臣所著有
方城集而此本實題宗子相集其卷目與明
史藝文志相合王世貞志臣墓稱其寢瘵疾
亟門人稍次生平著述凡十餘卷梓之則其
集乃臣未歿時所訂定也臣常與吳國倫論
詩不勝歸而精思累日月卒能卓然成家為
嘉靖七子之一其詩跌宕俊逸頗能取法青

蓮而意境未深間傷淺俗靜志居詩話謂使
其遇王李充之不難與昌穀蘇門伯仲自入
七子之社漸染習氣日以窘弱最可惋惜所
言誠切中其病然天才婉秀吐屬風流究無
剽剽填砌之習本質未盡漓也惟竹間諸篇
體近纖仄未免汨沒于時趨耳至其西門西
征諸記指陳時弊反覆詳明蓋臣官閤中時
禦倭具有方略故言之親切如是又不以文字

論矣乾隆四十三年九月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

宗子相集卷一

明宗臣撰

賦

釣臺賦

有序

余聞嚴子釣臺舊矣丁巳秋余以叅藩赴閩
取道兩越始登厥臺裴回焉商飈西來萬山
颯搖我心傷悲爰申厥詞把酒放歌白雲莽
互豈君之聞歌而來哉

恭承帝命以南邁兮弭吾節於富春儵微霜之隕百草
兮何芳杜猶菲菲其襲人睇嚴陵之舊里兮釣臺鬱而
嶙峋屯飄風其相薄兮吹石瀨之磷磷宿莽搖落而變衰
兮余又安得問夫白蘋余將懷椒糈而瞰臆兮蹇吾馬
之逡巡而不前豈以沉淪之俗羈兮乃不得以揖高士
而執鞭唯炎德之中天而興兮紛衆芳之雜糅以比肩
何佳人之夸姣以抗行兮乃獨抱孤貞而自全袞冕黼
黻之玄以章兮蓀獨愛夫羊裘歟鴻鵠之高翔兮聊寄

吾跡於汀洲昔傅岩之坂築兮武丁肖形以資厥猷非
熊之協帝夢兮渭叟起而佐周何帝之手詔以忤懷兮
羌獨偃蹇而夷猶故人之不忘舊懽兮情恍惚而至乎
帝庭何帝腹遽以足加兮太史奏之客星咄咄子陵之
不肯為理兮帝何獨惜夫沈冥蓀何高蹈而不顧兮乃
長揖以謝夫天子朝發軔於漢宮兮夕稅駕於江沚有
君如此其忍負兮蓀豈亡覩于厥旨痛韓彭之竟以烹
醢兮勃何辜而卒不免乎美里念盛名奇績之不可以

善終兮是用忍情而惜此蘭芷鳳凰之回翔而不肯下
兮豈網羅之所能施使蛟龍可得而常服兮又何以卑
牛馬而下之睇江河之趨下兮喟高風日逝而不可追
撫故迹而連蜷兮悵吾生之獨後時往者既已不可復
兮冀來者之猶可為委余珮之陸離兮掛吾冠於南斗
之墟擘長虹以為衣兮拾青霞以為琚托微誠於浮雲
兮搴其攬瑤華而遲予望美人而不見兮羌獨立以踟
躕亂曰維江有蘭美人植兮白雲茫茫歸何晏兮平楚

落日怨青楓兮歸來乎山中吾與汝嬉以遊兮

嘆逝賦

代作

嗟天命之浩蕩兮總萬品而為型唯一烝以回薄兮慨
靈畢之不可以計停睨衆卉之峻茂兮芳草紛而獨馨
何微霜之未隕兮而馨溢其先零君煜煜其少揚兮握
赤珠而馳騫朝飲馬于文苑兮夕弭節於玄圃既謁帝
之閭闔兮儼天門而廣步振瓊英之雜佩兮散瑤華於
中路奄分符以南邁兮宰蒼生於東越遵召杜之遺則

兮民蒸蒸其無艱鴻碩鬱其上聞兮爰降命于北闕司
寇之典邦禁兮惟女庶幾其慎罰何君之蹇蹇以高厲
兮捐鳴佩於上宮返初服之江蘿兮尋舊侶之桂叢志
士不能忘君兮念國事之倥傯羌重入乎承明兮陪謨
謀之從容錯帝章之璀璨兮統神人而旁達爰申命于
金馬兮日垂紳于紫闥儼夔龍於天上兮攬芙蓉於木
末艷球琳之可拾兮紛組纓之可掇富貴之易以盪情
兮君獨守乎故常奉星辰之晨華兮依日月之隆光當

青鬢之盛年兮奄乘雲以歸帝鄉悲回風之搖落兮攬
木葉而霑裳豈厭世之溷薄兮乃投情於幽渚將逐吳
雲以南征兮或戀燕都而北止或上而獨駕乎玄螭兮
將下而隨流乎赤鯉幽明聚散之永隔兮余誠不知其
故今名之蕪壽考兮自古以為難期回憲之不得永齡
兮千祀之所共悲余獨惜此芳草兮乃不得與衆卉而
共萎陳一詞以托浮雲兮聊寄余之遙思

宗子相集卷一

欽定四庫全書

宗子相集卷二

明 宗臣 撰

古調歌

池上歌二首寄諸子

芙蓉搖落兮驚素秋
簫鼓殷殷兮泛中流
瞻彼滄洲兮狎白鷗
美人不見兮使我愁
安得與美人相逢兮採萱
草以忘憂

蘼葭蒼蒼兮露為霜
秋風颯颯兮明月光
四顧天地兮

何微茫美人不見兮使心傷安得與美人相將兮折桂枝而徜徉

昔君別

昔君別我兮春草萋萋今我思君兮秋雨霏霏春秋既已改序兮君胡為兮不歸昔君別我兮江月陰陰今我思君兮海日深深日月忽其不停兮君胡為兮無音

今夕歌

今夕何夕兮星稀月明今夕何夕兮得與美人同行蟋

蟀在床兮淒淒則鳴江水浩蕩兮泠泠其聲何接美人
之慇懃兮乃使我惆悵而愴情

今夕何夕兮露下庭荷今夕何夕兮得與美人同歌山
有木兮木有柯水有鳥兮鳥有羅何接美人之慷慨兮
乃使我泪下而滂沱

今夕何夕兮日居月諸今夕何夕兮得與美人同車前
有溪兮溪有魚後有園兮園有蔬何接美人之珮環兮
乃使我氣結而欷歔

今夕何夕兮飛鳥鳴禽今夕何夕兮得與美人同斟奉
清醴兮彈素琴薦上珍兮揚華音何接美人之周旋兮
乃使我情結而霑襟

招隱詞

歸來乎山中他鄉莫久滯君莫慮無衣山中有蘿薜一
解

歸來乎山中他鄉莫久繫君豈慮無舟山中有蘭桂二
解

歸來乎山中他鄉莫久延君豈慮無飲山中有甘泉
解

歸來乎山中他鄉莫久羈君豈慮無飧山中有紫芝
解

昔思君

昔君與我今同心結髮今君與我今參商胡越昔君與
我今鴛鴦同池今君與我今南北異枝昔君與我今月
明星燦今君與我今風流雨散

送將歸

客子遠役兮駟馬馳駕言長往兮適郊圻念我同心兮
悵有違送君河橋兮牽君衣問君去兮何時歸恨無羽
翼兮同君飛歲暮不歸兮當誰依

白頭吟

君從何處來遺我明珠明珠亦何為可以照光儀光
儀君不顧照之令心悲

一解

君從何處來遺我綠綺琴琴聲亦何為可以揚芳音芳

音君不聽彈之傷我心

二解

君從何處來遺我紫鸞笙鸞笙亦何為可以揚清聲清聲君不聆吹之感我情

三解

車遙遙篇

車遙遙兮馬駸駸送君行兮河之陰望而不見兮傷我心
車遙遙兮馬蕭蕭送君行兮河之橋望而不見兮俾魂消
車遙遙兮馬翩翩送君行兮山之巔望而不見兮涕留連
車遙遙兮馬駸駸送君行兮江之磯望而不見

兮汨沾衣

萱草詞四章為伊母夫人賦

萱草離離兮山之陽
朱為衣兮青為裳
嗟彼秋風兮起大荒
俾其花日飄泊而不可見兮
何以慰此心之彷徨

其二

萱草菲菲兮山之曲
曳紫霞兮綴紅玉
嗟彼秋風兮振庭綠
俾其葉日凋零而不可尋兮
何以慰此心之躑躅

其三

萱草芬芬兮山之側對芳芷兮遠叢棘嗟彼秋風兮還
以仆俾其枝日偃蹇而不可起兮何以慰此心之嘆息

其四

萱草萋萋兮山之隅雜玄芝兮間綠蕪嗟彼秋風兮遽
以枯俾其根日蕭索而不可保兮何以慰此心之踟蹰

宗子相集卷二

欽定四庫全書

宗子相集卷三

明宗臣撰

古樂府

雉子斑

雉子斑斑乃游水湍朝游水北暮游水南五色其羽文
何翩翩嗟彼王孫來游江干須臾盼之忽焉見殘雉子
向言有鳥在天爾胡我殘有鴻在沼爾胡我殃嗟雉子
爾無言爾懼我殘爾懼我殃誰令爾斑

君馬黃

君馬黃臣馬青二馬並進臣馬停臣馬停君馬行飛塵
走電過龍庭一鞭邊騎驚再鞭邊塵平錦泥玉障垂勲
名吁嗟乎荆棘滿山山路黑君王未可馳八極

戰城南

戰城南望城北城北陣雲紅城南陣雲黑生當封侯死
當廟食一戰天門青再戰天門赤揮金戈擁雕戟馬走
疆人失魄百萬熊羆一時仆歸來麟閣名觀者坐太息

戰城南望城北

上陵

上陵何所見但見栢與松栢枝一何盛松枝一何青白
楊在其上秋風蕭蕭鳴金為闕王為楹石為馬銅為龍
重泉一以閉萬古不可磷悟彼泉下仙喟然動中情今
日樂且樂延年萬壽春

巫山高

巫山高上摩千層之青天
下渺萬丈巫峽之重淵
雲胡

為哉生其巔朝飛去暮來旋登山步雲令人神飛白日
可摩玄龍可騎下視浮世千萬里蒼茫浩蕩空煙水

丹鷺

丹鷺丹鷺不在天不在渚飛君堂為君鼓倡君歌起君
舞玉戟升朱矛舉燕明堂耀神兵享有道征不庭棲鳳
羽布龍城一人慶四海寧

有所思

有所思乃在大海南海路一何長海水一何寒迢遙千

萬里上有蓬萊山山中有真人顏色如渥丹青霞為君
衣紫霞為君餐桂枝夾道旁上長青琅玕羣仙三五人
游戲青雲端赤螭為前驅蒼龍護其闕月下散瑤步玉
聲何珊珊我欲往從之道路阻且難中心悵有違慷慨
起長嘆

思悲翁

思悲翁悲何極朝相思暮相憶今者華昔者黑白日難
東黃河難北思悲翁悲何極

臨高臺

臨高臺高臺何崔嵬南望羅浮東望蓬萊恒岳與秦華
颯颯雄風來一顧青雲飛再顧白日摧三顧天門忽以
開仙人三五輩冉冉霓宮迴仙人向我言君胡來君胡
來

聖人出

聖人出應昌期龍來游鳳來儀天地並日月齊統六合
化九夷產朱草芬玄芝延年壽萬歲期寄謝許由與巢

父及今不出待何時

艾如張

艾如張張而羅羅在山鳥則罹之羅在地鴻則罹之翩
翩者鳳萬里一去千年來過艾如張張而羅奈此鳳者
何

上之回

上之回駕雲車格皇心隆帝圖上之回來甘泉仁聖德
萬邦傳上之回臨三關走九夷服八蠻上之回歸明光

千萬年樂無疆

長歌行二首

秋風蕭索百草斑黃沙飄颻青海灣良人昔從征西班
一去十載不知還驚飈傳檄雲霄間邊塵渺浩難重攀
昨日寄我雙玉環萬里相將道路艱我欲為君整雙鬟空
閨顛顚推朱顏心如車輪不暫閒不覺涕淚衣徧爛征
人一一歸故山爾獨何辜阻玉關

秋山搖落秋夜長皋蘭寂寞被凝霜中夜起視明月光

蟋蟀鳴我房良人遠遊在他方道路一望阻且長
聞君有期歸故鄉為君旭日修新粧鏘鏘珮環曳鳴璫
盈盈移步來中堂望君不見心彷徨不覺淚下霑衣裳
忽見雲間雙鳳凰長天萬里同飛翔安得羽翼同颺颺
延頸悲鳴到君傍

出塞曲

壯士懷慷慨高義貫長虹甘心報國讐自矢忘厥躬遠
望邊塵起萬里揚悲風拔劒出門去驅馳遠從戎昔為

千人英今為萬夫雄
單于來接戰殺氣衝蒼穹
黃塵不可見白日忽以蒙
一戰雁塞清再戰龍庭空
歸來報天子獻捷甘泉宮

長相思

涼颼起高閣凝露被華滋
庭前有玉樹冉冉寒風吹
搖落愴中懷芬芳難獨持
嗟彼陰陽速嘆此顏英衰
攬衣起太息惆悵令心悲
君心妾不見妾心君詎知
尺書不我將何以慰別離
俯視清川流仰視白日馳
願隨白日

景照君見光儀

孤鳳篇

紫庭有丹鳳羽翮何翩翩朝游華山雲暮宿蒼梧烟一朝失其凰嗟哉相棄捐彷徨四海求何當待來旋采采琅玕實顧影徒遷延豈無鴻鵠羣而非情所憐悲鳴入赤霄翱翔不計年千載覽德輝來儀聖明前

鳳笙曲

翠管參差明月弄高臺忽起雙飛鳳彩雲縹緲華山洞

華山洞華山磯朝同出暮同歸

江南曲

碧草萋萋籠紫烟
蘭橈桂楫清江邊
吳歌越吹太可憐
太可憐復可妬
飄深紅曳輕素

龍笛曲

高樓縹緲流玉音
梅花零落寒江深
江中隱隱雙龍吟
雙龍吟吟未已
朝霞紅暮霞紫

採蓮曲

紅粧翠袖歌採蓮
三三兩兩鬪嬋娟
欲行不行落金鈿
落金鈿垂玉指
發青蘋照綠水

採菱曲

湖上菱花落復開
蘭舟桂楫去復來
妖童艷女行相催
行相催不可住
羅衣寒碧水暮

遊女曲

翠鬟玉珮遊春風
百花拂袖來湖東
朱顏灼灼驚飛鴻
驚飛鴻耀明月
人不見心如結

朝雲曲

朱雲縹緲來神霄人間天上俱迢遙
欲來不來巫山高
巫山高
高高無極夢相見晝相憶

趙瑟曲

邯鄲美女顏似玉翠袖朱絃理新曲
寒月泠泠江水綠
江水綠
江雲停誰為此湘妃靈

秦箏曲

翩翩羅襪明珠光抱得秦聲上高堂
調絃促柱移清商

移清商翻翠袖滿滿斟曲曲奏

陽春曲

春華燦灼春月明朱唇玉頰揚哀聲淒淒切切動君情
動君情得君悅流青雲飛白雪

關山月

良人一別妾長劒遠從戎涕淚青樓裏音書紫塞東關
河秋色動機杼月華空亦有寒衣在年年望北鴻

出塞

青海傳烽燧黃沙入鼓輦單于屯塞北大將出遼西落
日胡笳慘悲風漢馬迷燕然有奇石勒筆待君題

寄遠曲

秦塞君投筆章臺妾倚欄雁書何寂寞龍劍有艱難烽
燧春華暮琵琶曉淚寒自知容色落不忍對花看

其二

青海風煙迴黃沙信息稀徘徊空夜月顚顚任春衣漢
將頻營壘邊兵未解圍近來常涕淚不獨為郎揮

自君之出矣

自君之出矣消息阻風煙桂嶺花頻落榆關月自圓

其二

自君之出矣幾度寄春衣春色年年老良人歸不歸

江南曲四首

瑟瑟江上風密密山前雨風雨莫少停留得郎舟住

其二

春江君自去春閨儂自愁儂心似江水日夜伴郎舟

其三

綠窓春鳥聲思君淚如雨人來淚不收却道思家苦

其四

歡比堤上絮如泥亦如雪儂比鏡中花可見不可折

寄衣曲

征人夜度遼寒衣今去洛妾恐如寒衣春來不堪着

採蓮曲

蓮花比妾貌妾貌花不如蓮子比妾心妾心應更苦

相逢行

昔與汝相逢今與汝相別相逢萬山雲相別千山雪

清夜曲

明月朗故人相對坐清夜濯纓綠水前散髮青松下

梅雪曲

山上雪如梅山下梅如雪寂寞對空山幽香共誰折

月下曲

月下吹紫簫雲間整玉珮顧見鴛鴦鳥一一自成對

水中月四首

嫦娥三五月玉露千萬秋
久居天上苦暫向水中遊

其二

孌孌青山雲湛湛
清江水中天
落玉鈎魚龍驚不止

其三

雲歛波還淨
雲開影自隨
綠萍與青荇相傍桂花枝

其四

南山亦有羅北山亦有羅
玉兔滄波裏羅兮奈爾何

採蓮曲

採蓮莫採蒂
蓮蒂絲難吐
採蓮莫採子
蓮子心中苦

江上曲

青波遠泛舟
碧石朝逢雨
不見江上人
惟見江上樹

長相思

昔與汝相思
今與汝相見
相見已秋鴻
相思又春燕

江南弄

簾櫳上夜珠
闌干倚寒玉
客子在天涯
相思春草綠

江南曲

客去悲江左書來滯隴西相思若春草無路不萋萋

春閨曲

華枕為誰施華衾為誰卷妾腸非道路日夜車輪轉

楚陽曲

官府一開倉含情向兒女公者猶可遲私者不可已
東村有客到相留問烹雞婦言且莫烹租吏到河西
昨者娶新婦布裙止兩褶租吏呼典衣婦在窓前泣

賣花曲

長安買花者數株千萬錢道傍有饑者一錢不相捐

子夜吳歌九解贈李順德于鱗

于鱗上計上都余以職事直省中凡再易朔不
得通一語輒為之賦時命侍子歌之以通其恨
恨焉

出門望所歡零雪忽盈尺豈曰沾吾衣畏此雪上跡一
解

與君生別離三年參與商誰謂三年久不如茲夜長二

解

夜半倚梧桐明月何歷歷梧子在其上可見不可摘三

解

芳草五驂駟熠熠朝元者不分黃金鞭出入依君馬四

解

自幼能採蓮蘭楫蕩前渚如何蓮子心于今更覺苦五

解

聞君有瑤琴來自崑崙域雖未聽其聲時時白雲色 六

解

玉樹抽新條炎炎困赤土日望天上雲不得階前雨 七

解

自與君相別剪刀日夜利君有雲錦裳吾當為君製 八

解

手中珊瑚枝光華掩白日恐君一見之疑作君家物 九

解

宗子相集卷三

欽定四庫全書

宗子相集卷四

明宗臣撰

五言選詩

省中

鳴珮下紫霄巖巖府中趨冠蓋燦以繁羣吏肅前隅晨
風振遠楹宿鳥鳴高梧起步忽不愜嘆此中懷孤揚雄
草太玄相如奏子虛執戟亦云晚遊梁意何迂西京有
七貴黃金步天衢朝懽決車馬夕燕紛笙竽富貴詎可

常為樂亦須臾嗟彼榮華觀耽此寂寞塗取舍一何戾
志各有所須烈士多苦心斯言良不誣

秋夜省直

驅馬叩高扃秉燭照清池冉冉見芙蓉白露被華滋仰
見明月光三星燦以垂蟋蟀鳴重階繁聲一何悲感之
長嘆息嗟此陰陽移鹿鳴思野草宿鳥懷故枝人生貴
適志羈栖亦何為行行返舊服去去清江湄此意良未
申空令達士嗤

雜詩二首

結髮事明主忠義諒獨持出門遠眺望荆棘生路岐路
岐阻且深惆悵何所之中心既不回艱危何足辭不暇
恤其躬安能顧所私譬彼東流川九折常如茲昔為志
士模今為壯士規寸心明白日比德于園葵

其二

灼灼園中葵結根高樹林綠葉蕤紫芬芳華人所欽白
日豈不照高林蔽其陰中懷抱赤素誰為見予心予心

何足惜惜此日西顏白日如可待高林有時摧

擬古二首

冉冉江上蘭燦燦江中芷我友遠行役駕言適江汜江
汜波浪深嘆息從中起昔別春卉敷今思暮飈紫遊子
不旋歸浮雲日千里

其二

驅車事行游巖畔見芳草芳草綠以萋採之遺所好徘徊
歲云晏悠然傷我抱不畏芳草歇畏此關山道關山

阻且長客子行將老

歲暮

歲事聿已暮百卉何摧殘驅車臨長河悲飈激飛湍欲
濟無方舟行路一何難陶潛恥折腰貢禹彈其冠出處
各有性焉能違所安不見殫霞子飄飄青雲端

五子詩

謝山人榛

謝生隱者流偃蹇來京國朝遊燕山東暮遊燕山北悲

歌慨以慷慨騷奮孤翼興詞日百篇一一作者則嗟彼
雕蟲子不得施顏色韋褐以掩形藜藿不充食榮華煜
人世匪其心所惑盧生罹世網抹之一何力卒能脫其
患言者長嘆息非君策高踪斯義久荆棘

李郎中攀龍

大雅久寂寥作者徒縱橫之子起海嶽吾道維其盟中
心寡所諧長揖謝羣英眷言二三子斗酒懽相迎冥思
何可測奇語頻自驚仰並雲霞翔俯與江河傾高冥墜

白日非君誰與擎瑤篇一以出紛紛出時名譬彼韶護
奏缶音空爾鳴功名亦垂世無乃非其情

徐比部中行

偉哉麟鳳才婉彼蘭蕙質含英難獨持芳華耀朝日策
馬入金閨聲名從此溢冠蓋豈不榮而獨耽著述結藻
何翩翩札札弄綃帙駕言發藝林彷徨求侶匹隻言不
中諧悵望如有失燦爛繁星垂名篇諒非一律呂聞淒
絳譬彼清廟瑟詞賦千載謀斯人已入室

梁比部有譽

瞻彼飡霞子萬里來羅浮結束長安陌聊以寄薄遊中
懷既不開兀坐生羈愁俛仰一世間局促何所求鬱鬱
遂成篇燦燦雲霞流凌厲起高唱作者徒悠悠人生易
奄忽焉得無深謀黃庭一以悟萬事良蜉蝣振衣馭天
風長逝不可留咄咄迷途客栖遑良足羞

王比部世貞

天地亦寥寥斯人懷苦心弱冠厲高羽翩翩翔藝林玄

構入幽眇龍淵浚其深拂鬱神氣動萬象俱蕭森閉門
一停思白日常陰陰雄視百代間豈復論古今高歌以
慷慨顧盼酬知音不測心所之世人空追尋富貴亦云
樂而非情所欽寄謝當途子無徒耀華簪

簡吳明卿舍人

巖巖京洛間天門儼九重中有纓弁客翼翼從飛龍朝
聽北里竿夕聽南鄰鐘嗟哉揚馬才斯人不見容偃蹇
以薄遊朝餐夕不供抽翰燦春華揚藻凌高峰昔為一

時重今為萬世宗作者豈無傳誰能搜其鋒寄謝同心人斯理諒可從

寄江鄉舊好

故人渺天末江湖阻書告忽接瓊瑤音綿綿來遠道言採畹上蘭用以遠相報豈無他物貽將投君所好

楊氏園亭餞別謝榛二首

名園開綺酌芳榭停軒車飛蓋凌青雲冉冉振華裾尊酒以斟酌豐饌來中厨秦箏奏我旁吳歌慘不舒借問

遠行子離思竟何如倦此燕山遊去彼漳河居南北各
萬里佇望沾裳衣

其二

離思忽超越逍遙事行游散步過華池芙蓉夾芳流悲
哉蟋蟀鳴淒切動我愁凝霜芥零落明月澹飛樓感此
歲華暮耿耿生百憂居者不可去行者不可留去留兩
不愜何以慰綢繆

留別京洛諸游好三首

迴飈振蘭皋秋氣何蕭森神龍思遠波猛虎戀茂林駕
言返故鄉念子思難任握手不能別淚下沾衣襟四顧
何茫茫誰為相知音一為鴻鵠吟道遙內傷心

其二

與君結交心世人非所窺如何金石謀忽忽生別離懽
娛不可再沈思令心悲君還處金閨予將天一涯江湖
渺浩蕩會面茫無期行人從此去彷徨亦何為君其愛
玉體慰我長渴飢

其三

天風西北來蕭蕭動高樓搖落愴中懷何以慰離憂念
我平生親涕淚不能收豈不懷往路為君暫淹留執手
對長河情思良悠悠願言俱努力千載崇良謀

還至別業五首

游子倦行役歲暮返舊疆舊疆鬱壘壘觀者嗟道旁入
門見所親涕下各霑裳束髮去家園骨肉參以商山川
阻悠邈一別永相望何晤今茲夕還復登高堂兄弟勅

中厨堂上羅酒漿酒中阿母言見汝重徬徨汝今幸來
歸汝父在何方聞之益隕涕四座莫不傷

其二

父老聞我旋走書來相存長者羶貂獮幼者奉衣巾盤
飧多豐膳絡繹在吾門倉皇出肅客俱我平生親長揖
失次第各各叙寒溫坐中起相勞行路多風塵如何客
子顏反若生陽春自汝遠行游鄉園難具陳豺虎滿路
衢白日愁行人朝餐藜與藿夕卧無安衾飢寒且不保

骨肉含苦辛父老重起詞方與子所云子其勿語人恐
令長吏嗔

其三

結髮游藝林翩翩二三子聞我返田廬亦復來相視
我切雲冠蹒蹒東郭履入門將我衣嘆息傷情理長跼
前謝客故人心乃爾昔者遠行邁悠悠三千里寒暑忽
以流眷念桑與梓況我同心者愴悽何能已客請勿復
嘆主人聊唯唯堂上列旨酒堂下薦嘉鯉今日樂且樂

懽娛從此始

其四

驅車出郭門遠望陌與阡四顧以徬徨我馬忽不前別
家僅俯仰所歷何推遷高臺或為池崇岡或為田墟里
千百家蕭條無人煙壯者日以衰老者長相捐紛紛少
年子白馬鳴華鞭旦夕成老醜袒褐不被肩昔者人所
欽今者太可憐見之感我心泪下如流泉

其五

駕言俯長河行行至南浦荆棘一何深沒我舊時渡三
年滯行旅今日返其素階上蘭蕙花是我昔所樹搖落
蕭艾旁芬香日以故洲渚鬱蒼蒼瞻彼鷗與鷺若或見
其儔翩翩翔且顧往者不可追來者猶可悟行矣事春
耕秉耒躬晨霧寄謝逍遙子與爾諧中路

寄李順德于鱗

聞君出帝關手握五馬符朝發廬龍溝夕息涿鹿途白
玉掛君衣黃金耀君軀志意殊揚揚千騎為前驅雄聲

滿四隅英名照八區觀者擁長路皆言使君殊使君自
有志豈為功名圖一麾乃出守悲哉吾道孤

其二

煌煌京洛游四顧浮雲色興詞摘雄藻千載無終極悲
風起中天奄忽乖羽翼伊子歸舊疆之子走殊域相去
萬餘里愴惻動心臆登高遠眺望惟見荆與棘日落豺
虎吟狐狸潛道側願保金石軀慰我長相憶

贈王元美二首

送子上河梁悲風下天荒右顧渺太華左顧迷扶桑振
衣千仞巔風塵杳微茫爾獨事遠役駕言還帝鄉對酒
不能飲慷慨情內傷送君日以遙思君日以長安得凌
風翼與子共翱翔

其二

執手重行行步出城南隅飛蓋凌青雲良馬躍長衢行
人不可留中心鬱以紓子如雲中鴻予如汀際鳬浮沈
既異勢羽翼何時俱努力事功名宏此壯士圖願言俟

嘉譽慰我心區區

山中與陸長庚

秋日事行游游此清江湄俯視青鳥翻仰見白日馳人
生寄一世風塵豈足羈貧賤安其常富貴令身危浮雲
起西北帝鄉不可期甘此茂陵渴愧彼首陽飢商山有
同調行行歌紫芝

得吳明卿書

瞻彼雙飛鴻羽翼何參差哀鳴下前庭素書忽見貽開

函長跪讀一一故人詞相違日已遠猶能憶吾私忽思
疇昔容惆悵使心悲受君雙文綺報君雙桂枝此物未
為貴聊結山中期

懷謝山人茂秦一首

驚飈動四野白露下前除攬衣起四顧悠然懷所思所
思亦何在乃在漳南居朝設穆生醴夕曳鄒陽裾西園
事行游飛蓋列應徐近者日以親遠者日以疎不念同
心人所須在音書音書不一寄何以慰躊躇三復游燕

篇躊躇聊以舒

寄子與

清晨發東郊蘭蕙何灼灼採之遺我友我友在京洛道
路邈以修羽翼誰能托但恐霜露垂馨香日零落

七哀詩為伊氏作

驚飈動高林荆榛迷路歧中有愁思婦哀嘆一何悲借
問悲何為乃為良人思良人一以逝十載守空帷十載
何足言千秋常若斯風波一朝起骨肉以相疑生者不

可拒死者不可追寧使妾身捐豈使妾行虧痛哭迴白
日慘黯黃雲垂青山一憤絕重泉以為期寄謝朱顏者
貪生良足嗤

送客

客子向何方車馬朝日馳執手野彷徨送君清江湄江
水一何長悠悠繫我思出門有岐路世情多嶮巖黃塵
摧人顏玄霜切人肌去去勿復陳願君愛光儀

夏日池上坐

朱華蕤清漪庭草淒已綠歲月忽以馳流光傷局促古人亦有言夜游當秉燭感此傷我心前修以自勗逍遙放情志胡為自躑躅結廬在崇岡極眺滄浪曲朝游濯吾纓夕游濯吾足自知非至理聊以從所欲

聞錢惟重使楚寄贈

清夜事行游去上西山址百卉何腓腓荆榛被廣路明月照我懷浮雲莽不止對此感我思嗟彼遠遊子遠遊在何方乃在瀟湘裏道路阻且修相去萬餘里顧瞻雙

飛鴻眷言未能已

李伯章歸自郵來訪

秋飈厲長空鴻翼已高翥渚蕙日夜零亭臯被白露攬
衣起長望同心忽相顧入門見顏色慰我遙思慕我有
一尊酒聊以結歡娛君其勿遽行豺虎滿中路

贈孫子升文學

故人何處來車馬忽東驚別後髮空短花前首重聚送
君江上舟徙倚江上樹江閣正風波君且未可渡

又得明卿書

秋色滿天地悲風動高臺浮雲慘不舒白日忽已摧遠
念客游子鼓楫瀟湘回北顧金馬門東望滄海隈不念
舊所懽棄置如塵埃傳我尺素書抽翰空徘徊歷歷天
上榆冉冉庭前梅相思難重陳嘆息生餘哀

秋夜

秋風起高閣明月照芳池俯視清波流仰見羣星垂翩
翩池上鳥羽翼何參差攬衣起四顧白露被華滋冉冉

青桂叢采采梅花枝鳳凰久寂寞紫簫空自吹

秋夜寄陸子和

攬衣步前除白露被高桐枝葉莽零落大地回悲風明月起夕愁東壁鳴寒蟲四時一何速天地無終窮嗟彼客游子終歲常飄蓬十月無寒衣薇藿腹不充何事不歸來孤此青桂叢欲寄尺素書不見雙飛鴻

游湖上東高子明徐養浩

伊予好幽棲江湖任所適風起萬波驚日落千山寂悠

然命朋好中流移畫鷁紫石亂蒹葭明月散蘆荻散髮
事逍遙停觴恣探歷山上落梅花坐中翻玉笛誰共續
紛于世路任憂戚

雜詩

古來有志士壯心驚自竒仗劍倚天外蕭颯雄風吹遠
望一世間荆棘生路岐不若棄之去身世交相遺南山
可採薇北山可採芝結束向風塵惜哉爾空為接輿歌
哀鳳莊周畏為犧二子有至意可為達士規

出郊訪黃山人

駕言發北郊芳草萋已碧晨風叩石門
瞻此棲霞客翩翮倚杖迎嗟哉髮何白
攜手入中洲四顧感疇昔君著東郭履
我著東山屐行採山上芝坐倚山中石
客有一尊酒相藉終日夕醉來自盡觴
君其勿相迫

留別子培舍弟七首

驅車上河梁顧瞻舊鄉國倉卒骨肉親
彷徨動顏色子亦竟以南予亦竟以北
本是雙龍居胡為垂羽翼送子

從此歸涕下不能食子其從遠猷慰我長相憶

相憶在何所乃在河中洲結廬俯曲沼芙蓉夾清流飛
蓋凌朱霞逍遙事行游白鷺翔我側鴛鴦戀其儔駕言
邁遠役嘉會難再留引領內感傷行行懷百憂

百憂何殷殷坐令盈懷抱況乃歲云暮霜雪被長道遠
望何蕭條驚風摧百草當此別離情沈思令人老歲月
不相待所欽在蘭藻雲霄有遐路致身胡不早垂堂古
所戒畏途慎自保

自保良不易致身諒獨難豺虎在人羣平居有波瀾躑
躑紛四顧終歲渺燕歡君子慎厥趨取舍從所安艾蕭
滿中路涉江多芳蘭不見採蘭者萬古起長嘆

長嘆何終極感此人生累貧賤俗所輕富貴俗所忌豈
知達者心志各有所寄冠蓋五陵豪莽若朝露墜偃仰
一世間慘淡起遐思文章以經國千載無終始去去勿
復陳慎此青雲器

青雲紛四極不翳明月光高臺一以眺遠思從蒼茫鴻

鵠在中澤豈為謀稻粱神哉蛟龍志尺瀆寧終藏丈夫
志四海寥廓相翱翔朝遊過崑崙夕游畧扶桑無學兒
女仁白首戀故鄉

故鄉不可望錦江迥且深

父時宦蜀

東西渺無極傷此遠別

心寒風下庭樹宿鳥棲高岑對酒不能酌為子鳴瑤琴
琴聲一何悲泪下誰能任慰此骨肉懷款誠惠我音

湖上送徐子與使君

別君金馬門逢君大河陽相看動惆悵涕淚沾衣裳斗

酒且為樂清歌夜未央念子遠行役道路一何長嚴冬
萬木落白露為玄霜搖落愴中懷起視明月光攜手復
行行南北各一方風波不自保天地遙相望念此傷我
心對酒不盡觴願為雙黃鵠與子共翱翔

渡淮

白日下大川飄颻御方舟波浪漫漫浩浩簫鼓發中流中
流振天風魚龍莽沈浮恍惚對混沌須臾過千觴黃河
天上來奔湍不可留萬里起寒色浮雲黯不收范生思

擊揖仲尼嘆乘桴寥寥千載後壯哉復此游

淮上雜詩三首

攬轡登崇岡車馬何縱橫王侯有第宅長衢耀飛纓堂
上列吳謳堂下鳴秦箏豪華竟何在今古惟枚生都尉
豈足數為郎亦何榮偃仰一世間長揖傲公卿獨負詞
賦才千載垂芳名對此長太息聊以舒鬱情

其二

寂寞韓侯居奕奕韓侯祠晨風動高林落葉何紛披侯

也未遇時偃蹇何足奇仗劍逢真主百萬驅熊羆英畧
照中原雄心狹四維惜哉壯士規乃為兒女欺楚漢分
鼎立侯也胡其疑英雄偶失策萬古有餘悲

其三

世人重結交紛紜騁路衢貴者日以近賤者日以疎嗟
哉漂母心乃與世人殊壯士困風塵誰為識雄圖況乃
飢寒色一飯立相呼一飯何足言感此心區區千金以
相贈華名照四隅何世無英雄按劍疑投珠瞻彼垂綸

者泪下連衣裾

贈黃戶部

主人敬愛客招我清江湄悲風起天末白鷺羽參差方
舟揚素波簫鼓傳山陂中厨出豐膳華筵列芳卮秦箏
奮新聲淒淒一何悲歌者歌自苦知音竟為誰懽樂不
可常去去從此辭風塵愴中懷令德以相期

贈伊文學

故人亦何在乃在青山東山家何寂寥高樹來天風貂

表日以漱龍劍何其雄下可制巨鰲上可斷長虹風雲
起一朝寧復嗟途窮去去重相思寄言雙飛鴻

贈施司封三首

涉江見芳草春華被遠岑薄言採其華將以貽所欽顧
念客游子分符越江潯江水東南流波浪阻且深涼飈
摧百卉孤芳孰能任置之在懷袖無令歲寒侵日月忽
以邁馨香紛至今非君垂末顧誰能識予心

其二

昔君守南服伊子還舊磯沈浮既異勢音書乖以違袖
中有尺素遲彼雙鴻飛雙鴻不可見嘆息霑裳衣思子
忽若渴望子忽若飢豈以負薪累甘貽伐木譏中心諒
無他願君察其微

其三

清夜良燕會零霜下前除堂上羅酒漿堂下薦嘉魚鳴
琴雜清商音響一何舒酒中客起言責我愚且疎主人
前謝客茲夕且懽娛金石昔所敦蘭芷昔所貽中心既

以諧豈為形迹拘古來重結交終始貴不渝垂紳戒朝
夕君言宜重書

牛渚望謝朓青山二首

歲暮遠行役睠此清江湄顧瞻江上峰白雲何歲蕤伊
人昔結宇英詞光陸離歲月不相待高踪邈何之采采
山上蘭熒熒山下芝芳菲未終夕白露忽已滋江流漫
浩浩佳人歸何遲山川無終極人生會有時願言崇遠
業千載與子期

與子期何方迺在青山址白石何磷磷照此澄江水下
山擷江華上山尋石髓高風一以逝浮雲日千里荆棘
滿山隅巖洞日凋毀玄夜啼猿狸白日行豺兕我欲往
瀟湘採彼蒹與芷採之欲遺誰之子不可起悠然傷我
心嘆息滿江汜

紫陽山

驅車上崇岡紫陽何崔嵬石壁倚萬尺悲風日夕來吹
彼蘭蕙花馨香芥以摧哲人昔遁世結茅茲山隈微言

破萬象精靈遍九垓山鬼夜不至天門白日開玄風忽
已邈流光照高臺不見松與梓唯見蒿與萊浮雲黯以
寂泠泠山泉迴俯仰長太息千載有餘哀寄謝山中人
漱石掃莓苔他日息吾軫晞髮信悠哉

寄人一首

浮颺動廣野白日慘無色之子在萬里山川渺難極豺
狼滿路衢況復荆與棘我欲往從之惜無晨風翼因風
寄瑤華歲事日云夕去住渺懽悰撫膺長嘆息

夜坐一首

燈燈江上蘭冉冉山中桂春風發華滋堪以結吾佩如
何蕭與艾忽然滿中路徘徊不可問潛焉空隕涕

江門有懷

辭彼青蘋闥還予紫石磯駕言遠行邁晨曦淒以微如
何金石交一旦阻音徽江山修以邈寸心詎能違南山
亦有蕨北山亦有薇不見夷齊子嘆息將安歸

宗子相集卷四

欽定四庫全書

集部

宗子相集卷八

五至

詳校官監察御史_臣陳化龍

侍讀_臣孫球覆勘

總校官原任中允_臣王燕緒

校對官編修_臣閔惇大

謄錄監生_臣嚴儀

欽定四庫全書

宗子相集卷五

明宗臣撰

七言古詩

水頭遇雨

滄海何年落南浦芳草碧盡綠苔古我携春色帝城來
共駕長虹擊鼉鼓青山拂袖玄猿呼白波搖空恠龍舞
黑雲一片落吾盃馬上行人怨風雨

秋夜吟

炯炯晨星稀復稀
明月滿天垂紫微
靈瑟風生帝女至
金莖露冷仙人歸
漢庭朱鴈去已遠
昆池碧雞竟誰依
仰天長嘯好自去
十年吾負山中衣

明卿夜過各賦長句

驚飈亂捲星如雨
予歸淮南君去楚
明月浸冷廣陵船
綠蘋愁絕瀟湘渚
尺書在袖數鴈鴻
美人中夜怨砧杵
乾坤日遠欲問誰
閭闔天高重遇女
一笑浮雲墜青天
五斗金莖聽白苧
萬片龍鱗江上來
為爾直取天河煮

共向天門騎白螭肯向人間問腐鼠醉來高卧北斗旁
無數松篁月下語

二華篇

有序

嘉靖丙辰九月濟南李君攀龍由順德守擢為
陝西提學副使余為之賦二華之篇夫二華西
北巨鎮也往歲秦地大震山缺河溢壞廬仆人
二千里人煙幾絕則二華之故乎君往矣即二
華猶有不若者君何辭焉

我聞西極之精忽墮地化為巨石如天長孤根倒挿黃
河底竒峰直聳天門旁天門牛女不敢渡斗域羲龍那
得翔上帝聞之惡其彊擘為二華遙相望太者在西少
者東千崖萬嶺盤晴虹東來不得數泰岱西去那復誇
崆峒中有紫髯白皙三五公手持綠玉披芙蓉有時踏
天跨白鹿鎮日鞭石揮青龍零露不斷仙人掌古雪常
吹玉女峰忽見悲風萬里來蒼螭赤蛟何雄哉金鱗乍
開似飛電怒角並鬬如奔雷驚沙飄忽天柱動狂飈迅

急坤軸推玉女散髮亂峽走仙人赤腳滄海回地顛山
愁千萬里奇峰片片下沈水黃河直上峰頭坐忽散人
家室屋裏往往屋上遊赤鯉千門萬戶半作鬼廣厦高
宮盡成土白日不聞父老哭青天唯見魍魎舞二華二
華誰能主我聞李侯佩玄珠截日飛霜天下無侯今躍
馬函關去豐隆招搖為前驅千峰明月亂相逐萬里白
雲驚且呼侯之往矣何為乎為我停車華山隅手挈蛟
螭山下趨仗劍一一數其辜山之推者叱其立黃河在

手如持盃山上芙蓉色不枯仙人玉女復來吹玉竽侯
也與之長相須千秋萬載同歡娛侯向二華去聽予二
華歌二華未到歌先到石走龍吟侯奈何

春日姚園同德甫明卿元美讌集分賦得下字
帝遣春風來薊門吹作靡蕪綠遍野我本商山采薇客
遇爾瀟湘佩蘭者鞭龍直上碣石宮披雲高卧崑崙下
袖裏瑤華寒不開洞口新松翠可把一酌滄江破几筵
片語青山墮杯竿君不見長安意氣五陵豪笑殺文園

病司馬

秋塞曲

塞雲垂天邊草肥邊兒牧馬向金微赤城刁斗日夜急
黃沙羽檄縱橫飛漢皇立下明光詔將軍起披金鐵衣
熊羆百萬夜出塞驃騎尋常朝解圍捷書一日走千里
試問三軍歸未歸

送王判之裕州

使者金羈佩紫貂高楊繫馬寒無條勸君為我且停盃

朔雲滿地西風驕與君結交非一朝君方綠髮予垂髫
父子兩世共蘭芷英雄二十猶漁樵山中蘿薜日携酒
江上芙蓉夜放橈愧予已上長楊奏今君亦結河陽綬
浮雲回首有窮通丈夫得志無先後只今南北講戈矛
至使瘡痍盈宇宙東吳未見淨江氛中原且復憂山寇
知君久抱青雲志乘時即把蒼生袂憶君先子大
夫才每每逢子青眼開冀北聲名昔無比劍南父老
今猶哀青天白日同崔嵬君之往矣何愧哉富貴祇

如天外雲功名應比庭中槐循吏漢詔下蓬萊遲君躍
馬黃金臺

金山篇送徐子與奉使江南

昔日秦王鞭石過東海大者並立小者卧東風一夜拔
扶桑片石怒走江中坐千年海若呼不回一線滄江從
此破滄江之水何處來瀟湘洞庭蒼梧開驚濤巨浪幾
萬里排空拍斗如奔雷吁嗟此山何雄哉白日不動天
崔嵬下攬吳越荆楚之秋色上標鍾山渤海之朝虹奇

峰三百倒懸水青楓碧樹搖玲瓏金刹瓊宇不知數一
一亂插馮夷宮有時蜃鼉逐麋鹿鎮日魚鼈追鳬鴻忽
然相遇不相識莫不駭訝狼藉號天風白日滾滾去不
窮明月復爾臨高空萬頃珊瑚碎江水鮫人龍女紛然
起以手捉之不可得嫣然一笑滄江底恠龍忽上崖頭
舞似聽山僧讀禪語龍珠上與月華爭明月不得復為
主當時赤手縛龍珠夜半空江驟風雨一自此龍失其
珠日日江頭怒且呼金山晝夜叫猿鶴丹陽南北愁旅

蒲徐卿仗節往三吳渡江先上金山途江中恠龍遠相
避山前明月高自孤妙高臺上千江秋千江直與天門
浮峰頭明月能我留與卿同為汗漫遊上令星辰不敢
收下令江海不敢流龍兮龍兮遁去不知幾萬里即有
明珠還自投金山金山慎莫愁

薊門春望

薊門春望春冥冥黃鸝交坐啼不醒尊前楊柳洒人綠
江上蘼蕪愁自青楚人瑤瑟怨湘雨漢室漁竿垂客星

誰其採藥向滄溟遲我巖前紫石屏

同峻伯助甫賦得春月

席上賦

瑤天霜白綵雲歌東風吹出海門月紫微仙人醉相逢
摘來掛在黃金闕千頃琉璃散萬家直從燕趙望吳越
白榆浸濕天孫衣蒼梧泣冷湘君髮玉兔高啼驚夜烏
青桂低垂碍春蕨何當捉爾泛溟渤夜夜老龍哭深窟

古劍篇

有序

嘉靖丙辰十月吳郡王君世貞由比部郎中出

為山東副使督戎青州其友人廣陵宗臣贈以
牙衣一襲腰帶一束古劍一口又為之賦古劍
以遺之其詞曰

赤堇使者昆吾子碧眼炯炯虬髯紫手持雙劍下山麓
上有蛟龍缺其齒道上相逢忽相贈恠雲悲風生席几
胡僧為製珊瑚鞘南海琅玕襲其裏佩之朝夕不離身
北遊燕趙南江汜江上秋風倚劍行波濤上沸如山峙
老鯨毒螭數千尺金甲火鬣中流起刺來一一烹其髓

鮫人終夜泣瑜珥況復山中豹與兕又況人間鹿與豕
自吾佩此二十年處處江山半戎壘明時不得抱鼓旗
腐儒空復談簞簞國讐未報壯士恥永夜高歌常拊髀
劍乎劍乎吾負汝吾今有友吳郡生紫鬃朱纓乘騄駼
青天開府泰山巔落日飲馬蓬萊汜吾解一劍贈生去
星辰亂落莽不止生乎生乎吾語汝左挾圖書右弓矢
豺狼只在大道傍魍魎豈必深山裏生乎此劍一在握
上天入地任君使只恐風雷日日生海上千關盡掩耳

天吳海若俱遠徙真宰聞之或不喜嗚呼古來神物有
離合斗間紫氣無終始他日中原倘相遇雙劍雌雄各
相砥與汝並驅千萬里世上風塵空復爾

送白明府之汝南

昨日逢君薊門東千家揚柳春雲碧今日送君薊門西
匹馬翩翩夏雲白白雲一去二千里君亦隨之渡汝水
汝水照人明月寒君家心事亦如此聞君昔綰瀟湘符
風流文雅寄蒼梧黃金燕市大如斗遲爾雲霄雙玉鳬

寒夜偶過吳峻伯讀其山中諸篇分得天字

席上

賦

北風吹折西山巔長安有酒斗十千下馬逢君輒成醉
北斗倒插闌干前主人為我開瑤編讀之一一山中篇
滿地巖嵒走白石四壁紛紜行紫煙天目之峰幾千萬
忽然並掛金華箋泠泠屋上鳴飛泉滾滾盃中注百川
使我對此心茫然當時我有百花洲垂楊十里滄江邊
織女為我栽白榆太乙為我栽青蓮狂時上抱明月舞

醉來忽枕浮雲眠，有時赤腳踏龍淵。
蛟龍窟宅時時遷，只今一別三四年。
風塵車馬徒相牽，梅花歲歲怨其主。
芳草日日私自憐，欲歸不歸誰之愆。
何時與君同上江門船，二十四橋歌嬋娟。
直從白浪尋青天，千秋萬載凌飛仙。

歸嘆

薊門春盡雲陰陰，倚杖出門愁暮禽。
千金裘馬只自好，萬里江湖誰復尋。
武陵一別桃花深，欲歸不歸傷我心。

青楓未老楚月白吾將長嘯投吾簪

廬山歌寄贈吳明卿時以黃門謫豫章從事

南斗日夜敲太白化為五老八萬尺並跨古螭下九江
猛風吹作倚天壁手懸石鏡照天門日月東西亂相射
香爐之峰挿其南星辰燒作珊瑚赤青天忽墜金芙蓉
九十九峰破江碧峰頭白鹿銜紫雲紫雲片片大如席
石梁瀑布天上來百折寒濤瀉琥珀玉虹雙夾孤電翔
急雷長闖銀河坼佛手巖前石鼓高有時擊鼓天烏號

三五仙人驚且起東方先生騎紫黿帝前大醉黃姑膠
復向瑤池三竊桃手把瓊枝雲中翔下視八荒如秋毫
帝也聞之惡其豪一朝謫下廬山去九華之冠赤霜袍
腰間雜佩金錯刀彩霞捲地飄組練蒼烟控馬排旌旄
直上峰頭叫五老五老却立呼其曹客來餐之白鳳膏
醉持龍角如持螯江間古龍聲嘈嘈倒鞭白鹿滿山走
白鹿夜夜哭且吼赤松不敢與之遊黃石不敢與之友
樹杪九江如一線織女抽來紉吾綬東折扶桑煮天潢

白露金莖日五斗西方之曄摘為帚掃盡閭闔萬古之
浮雲攬盡瀟湘萬里之秋色一一掛之千楊柳我欲白
日借羽翰尋爾彭蠡之左鄱陽之右不然爾跨白鹿來
北極又恐封狐嘯君前雄虺跳君後我亦竟不去爾亦
竟不來袖中彩繩十萬里直繫廬山入酒杯奇峰峻嶺
收崔嵬白鹿暫卧玄圃臺與爾共醉三萬六千日池上
蟠桃十度開五老隨之日日哀長跼求歸日百迴然後
放爾廬山大江去東方先生還蓬萊共駕燭龍遍九垓

他日倘過廬山側江頭拳石何有哉

湖上幽棲四章為沈二丈賦

主人結屋楚江曲身披薜荔坐空谷青天雙眼望鴻鵠
春風一夜開石門萬里靡蕪散新綠

白雲莽莽行山阿北窓疎簾高枕多赤日紅塵將奈何
天風忽送千江雨為爾巖頭洗薜蘿

瑤天露白彩雲沒細掃青松烹紫蕨中夜星華濕秋髮
波間古龍忽啾啾人在滄江弄明月

三五幽人踏月華
湖南湖北尋梅花
相逢疑到赤松家
中流一曲寒江笛
吹落崑崙萬片霞

武陵歌

有序

武陵者顧子別業也
顧子讀書溪上二十載
今歲始薦于鄉鄉書至時
余夜偕諸省郎直省中
也一覩顧子名則頓足起
命侍子舉白援筆成篇
時嘉靖乙卯冬十月望日

武陵倒插西湖邊
明河吹碎瑪瑙圓
桃花千樹墜紅雨

垂楊十里排蒼煙中有紫髯白皙之神仙手抱明月湖
上眠玉華樵者時送酒綠蘿漁子歌採蓮檻外星辰大
如石床頭蛟龍細似蟬秋風吹出紫霞去赤手駕鰲滄
江前忽向月中拔青桂千枝萬枝泣嬋娟三五仙人騎
古雲北斗錯落衣翩翩坐令相揖不敢先捷書一夜飛
天門漢家天子坐甘泉朱衣侍者人一編我得聞之心
茫然武陵之卧二十年昔者何為與世遺今者何為與
世憐十月冰霜塞大川長安美酒斗十千黃金絡馬白

玉鞭遲君鳴珮共朝天只恐武陵春色怨其主落花千
尺啼曉鶻令君欲歸歸不得楚江楓冷釣漁船明月來
移北山篇

伯倫席上遲峻伯不至戲贈

銀河凍裂明月哭君胡獨抱浮雲宿我遣明月坐君屋
屋下浮雲亂相逐縱有仙人渡銀河明月不出君奈何
為君呼月還上天君胡不來愁嬋娟

送施子之豫章

我聞李白遊江海西愛匡廬東九華九十九峰江上青
五老香爐飛紫霞今君家在九華佳時與仙人數落花
一日拂袖起為吏復得廬山對官衙人生出處貴適意
區區冠蓋何足誇唯得名山共朝暮翠屏錦障天之涯
豫章之牘紛如麻君其理之勿怨嗟只今海中之寇數
百萬日日江門喧鼓笳西望豫章僅千里一朝可以飛
浮槎紫微羣貴芙蓉夕君其豫言勿復惜九華匡廬動
顏色

寒夜偕助甫集方懋藩邸中各賦放歌分得陽

字

驚風吹破明月光琉璃片片成邊霜邊霜落地幾千尺
白虹亂走凍且僵今夕何夕登高堂入眼拳石裂崑岡
搖星勺水流瀟湘相逢意氣何飛揚為君呼明月坐君牀
叱白虹飲君觴床頭魍魎不敢哭盃中江海波顛狂三
五仙人歌春陽欲下不下愁霓裳忽然夜半叫鸚鵡恍
疑天外趨鳳凰明珠乍落三石梁奔龍飛電鳴干將明

月不肯住白虹且欲藏吾將直跨白虹去青天手抱明月翔他時訪我天河旁與汝散髮抽扶桑

張園同高伯宗諸君餞別朱主客于价得山字

君握瑤華來天關天關夾龍振金環掀髯大呼夾龍走星辰亂落供奉班金莖拔倒仙人掌零落吹亂玉女鬟手持北斗叫閭闔足踏銀河弄潺湲河邊白榆不敢發海上青鳥那得閒君乎胡為忽歸去邊霜日夜彫朱顏唯有明月可贈君隨君直到江門山江門之山千萬峰

春風吹出百草斑百草那比青桂枝千秋萬載誰能攀
君乎君乎何時還至今方朔遊人間

再餞朱主客得動字

北風倒天天河凍長安萬戶走虹蜺使君且莫據雕鞍
主人復爾開金甕四嶽同懸平子愁五餌久抱賈生慟
謁帝聊與千鷺翔乘雲誰把羣龍控杯外星辰寒不收
江南楊柳春先動我有秦時白玉簫仙人寄我華陽洞
仙人一別幾千里今日臨岐為君送君去清江時一弄

為君白日下雙鳳鳳兮鳳兮胡不來白雲愁殺金陵臺

長安行寄人

長安客子傷春情出門愁聽朝啼鶯關山作客胡不去
梅柳向人春又生江頭蘿荔懷楚佩席上夔龍愁漢纓
邊馬至今日夜急塞鴻何事東南征人生去住不得意
愧爾山中餐石英

元美將之青州書來約會已乃徑去悵然席上
賦此得寒字

天風吹落九塞寒使者高標切雲冠夜半騎馬如跨龍
白玉之鞭黃金鞍馬首明珠聲珊珊赤髯綠眼光走電
提戈百萬俱材官忽然紫氣逼長安聞君已到使君灘
望而不見空長嘆朝趨碣石暮邯鄲何當白日生羽翰
尋爾直上青雲端雲中吹簫弄紫鸞仙人授我金液丹
洗之天河吹波瀾波瀾一洗天河乾支機之石日夜殘
縱有女媧不得完手持明月如弄丸下照人間千琅玕
人間天上長交歡永無離別推心肝君不見雙劍精靈

千萬丈至今人向斗牛看

小除夕偕馬太史吳駕部集助甫宅分得源字

席上賦

自吾高歌踏紫垣
邊霜朔雪愁天門
玄冥走天嫫上帝
帝遣青皇下雲根
放爾霜雪歸故山
手携春色來乾坤
寒雲咫尺即相別
春風已坐千門喧
人生三萬六千日
日日催人白髮繁
青皇暫且停高軒
吾將乘槎上河源
天河在手星辰翻
夜半雲間泣天孫
九鳥不敢上扶桑

六龍空復怨崑崙主人今夜開金樽樽中北斗明黃昏
來朝栢葉不須辦遠天椒花那足殮春風苦意不相放
吾其遲爾桃花園不然待爾楊柳村楊柳學人舞桃花
作人言願君留春似留寒千山萬山啼曉猿

除夕放歌行同助甫賦

北斗沈天海雲黑羣星亂落化為魃萬丈寒光忽相逼
碧眼小兒驚且惑邊霜朔雪高如山入門長跼泪沾臆
一自逢君坐天門夜夜為我生顏色今夕辭君歸故域

何以贈之寄相憶霜華雪片五千石留君篋笥充君食
令我聞之長太息床頭雲白天地開青春已駕雙龍翼
吁嗟東風一何力一夜吹破扶桑國走天直把青春縛
携之懷袖光如拭靡蕪叱向盃前生楊柳只在手中植
翩翩春衣雲錦章呼爾天孫為子織明月為車虹為軾
駕之可以凌八極何問江南與冀北

新春二日同助甫過峻伯夜酌共賦治字

席上賦

青皇日與青春狎酒星夜勸青皇洽斜抱金烏日觀歌

倒騎玉鰲天柱壓下視九合一何狹斗柄為鋤箕為鍤
楊柳萬樹天河插風吹新葉落人間織女為我裁春袷
着來與爾上崆峒何人不訝蒼龍甲

湖上行

湖南湖北雲陰陰石門曉開千樹林日月雙推綠髮短
江湖獨與青春深楊柳垂絲為誰結靡蕪千里傷予心
落花流水去不返武陵桃源何處尋道路只今亂赤羽
乾坤何處非黃金日暮聊為楚澤吟慨慷流涕霑衣襟

桃源古城

桃源城頭萬木秋
桃源渡口黃河流
黃河一去不復返
天風萬里吹古愁
荒郊莽蕩走狐兔
石棟曲屈盤龍虬
天下英雄曹與劉
虎臣矯矯何所謀
中原未復壯士去
至今精靈耿耿光
神州千秋桃花不
復發
卧龍何處聲啾啾
秦人到此不須住
野燐夜夜吹枯樹

何侍御為予談泰山蓬萊東海之勝令我飛動

輒賦長篇

三年不見金門客走馬相見清源陌自言前上泰山巔
東海蓬萊皆所歷人傳泰山高比天層崖曲蹬路轉窄
振衣直上最高頭恍然一嘯天門白天門東西相對開
星斗髣髴落吾額悲風搖落吹骨寒雖着重裘似絺綌
三峰插入青雲中巉磊突兀倚天壁日觀峰頭望晨日
晨日沈沈起深澤須臾忽上如奔馬天地四方俱色赤
破竹裂木不可當恍惚半空飛霹靂杖策携壺行復立
一一詢茲今古迹漢皇尚留封禪碑秦人猶剩紀功石

蓮花桃花千百峰隱隱四出如列戟南望吳越西望秦
萬里青天起寒色迴駕又登蓬萊山蓬萊迺在東海側
東海一去何終窮浩蕩微茫湛空碧仙人共把珊瑚枝
白日觀潮夜觀汐忽然長風振天末兩儀不辨海雲黑
驚波巨浪排空來恠石竒巖怒且激蛟龍奮起不可制
神魚動尾幾千尺左右大呼東西走令我欲歸不可得
廣陵狂客心頗雄聞此意氣滿胷臆長劍欲摧玉女峰
短鈎直下蛟人宅海中魚龍手可搏山中虎豹力能射

何時拂袖謝塵世與君散髮步天極坐看萬古乾坤自
開闢

五月歌

五月淮南尋舊廬百花洲上楊柳疎故人朝對白蘋渚
健兒忽傳赤羽書千山烽燧照蘆荻滿地干戈盡樵漁
孤舟江海欲何之雙眼乾坤空汨子東南半作豺虎窟
閭閻忍使蛟蜃居蒼生之血淮水赤請問將軍意何如

江上行

浮雲壓地烏夜啼
家人聽作天鷄王
孫何事復遠遊
江南芳草春萋萋
陶令亦有五柳宅
秦人常憶桃花蹊
英雄偃蹇何不可
顏色肯為時人低
君看眼底相逢者
誰似江流不肯西

山中夜坐

朔風亂掃江雲飛
山人為予開石扉
一斗胡麻煮未熟
散髮千峰歌采薇
吳江楓落客已遠
楚塞秋聲鴻未歸
明月墜地白如水
濕爾巖頭蘿薜衣

登江門諸山

山頭日白雲英英千峰倒插千江明手把芙蓉步石壁
蒼翠亂射猿鳥驚誰其雲外吹紫笙欲來不來空復情
天風吹我佩蕭瑟恍疑身在崑崙行

江上訪朱氏

黃雲墮地秋離離西風搖落千楊枝白蘋已老暮汀遠
滿目丹楓塞鴈悲孤舟一夜相思發寒江明月吹參差
天末佳人猶未歸江頭解佩欲遺誰

白氏園亭別袁戶部

石門斗酒開夕筵
桂花欲開秋蘿鮮
崑崙片碣挿眼底
滄溟勺水流尊前
落日千江送蜃氣
高樓百尺搖寒煙
今夜共醉廣陵月
明朝又上丹陽船
人生聚散若萍梗
相思寄我停雲篇

江門別歌

千山白雲吹暮晴
江間古龍啾啾鳴
山人乘虹出石屋
贈我萬片秋菊英
令我餐之霜雪清
何以答之千杜蘅

風塵半世滿鬢髮愧爾煙霞凌太清長波東去有萬里
吾欲乘風濯吾纓

吳關吟

孤槎昨夜叩吳關天風吹度茱萸灣人生聚散忽如雨
更開斗酒秋雲間山中細草綠於髮江上驚波高似山
使人對此愁朱顏勸君何事不早還君不見赤城明月
白可掃夜夜仙人吹珮環況有瑤草可同攀君胡自令
雙鬢斑

江上行

揚子江頭春雨殘，廣陵城外暮潮寒。
美人不見空捐珮，極浦逢春誰采蘭。
山中碧草有何意，江上梅花只自看。
一片孤帆掛河漢，直須尋爾洞庭灣。

夜歌

萬片浮雲墜江白，江上青楓愁楚客。
天風忽送明月來，為我山中掃蘿石。
醉把長簫石上吹，散盡長空秋一碧。
湖上遇子與舟中，夜酌放歌

射陽湖上逢徐卿揚旌走馬來江城袖中慷慨出新詩
異哉擲地金石鏗海內交游別離久一一感嘆詢其名
為言謝生白髮甚李生慘淡違世情梁鴻尚滯羅浮南
王吳跋扈馳西京西南忽有一二子世人往往傳先聲
文章不朽之盛事肯使此輩相持衡瓦缶紛紜塞天地
英雄負慨何時平徐卿徐卿且莫嗔與君今夜開金罍
一斗百篇不足數暗啞叱咤雄風生長空日落波浪黑
匣中神劍鏘鏘鳴忽然一躍太湖去天門日月雙珠明

倉卒波底走毒鯢須臾天外飛長鯨鯨鯢搖曳幾千尺
搏來一一烹作羹徐卿徐卿未可行東吳戰鬪勤天兵
閭闔擬上賈誼策轅門欲請終軍纓男兒苟不封侯食
萬戶區區富貴何足榮不若與爾西極上訪長庚精扶
搖萬里來蓬瀛醉時一酌滄溟枯狂來一嘯華山傾更
須共挽天河水洗盡紅塵千古清徐卿慎勿忘斯盟
呼徐卿慎勿忘斯盟

酌洞口

華陽洞前秋如霰華陽洞裏光走電聞道寒雲深復深
石壁一竅細如線吾來大叫石壁開綠眼仙人夜相見
留之三日不出門咽盡桃花千萬片

貞白祠

華陽山前貞白祠貞白先生騎赤螭白雲茫茫去不返
天門秋冷雙虹垂吾來山頭尋紫芝紫芝蕭索令人飢
出門白石爛如泥切來好煮青松枝與君大餐各五斗
千山萬山隨所之

江上送別胡國子北上

建業城南江草碧
揚子渡頭江雨白
青山雙屐曉逢君
明月孤帆夜催客
英雄四十困樵漁
於今謁帝承明廬
燕市黃金大如斗
袖中一片賈生書

上亭夜讌放歌

仙人好乘白鹿車
相逢要我飯胡麻
石壁千尋掃落花
落花萬片下人世
一一凝結為紫霞
只今已到赤松家
山頭瑤草如蒹葭
采之兩袖白如雪
須臾五色生天葩

滾滾床頭走白沙為我種棗大如瓜銀河千尺墮几席
取之石鼎烹為茶門外蛟龍時一吟恍若春江聽鳴蛙
醉來直走萬山頂吸盡瑤天明月華與爾天漢凌仙槎
既別子與憶之一首

闕

白鷺洲夕泛

楚客扁舟晚何適千峰萬峰秋欲滴一尊落日墮歸鴻
萬片斷虹隨暮鷗美人何處摘蘭苕白鷺千行起蘆荻
明月偏思廣陵簫梅花又落江城笛與君一醉大江頭
醒後天河掛東壁

燕子磯

燕子一去滄江濱燕子之磯石磷磷滿江波浪近愁客
永日蛟龍常傍人白雲對酒不知晚高蘿盈砌今幾春
洲邊芳杜還憶楚洞口桃花未識秦吾將買爾磯頭一

片石歲歲孤舟垂釣綸

登方山

短筇匹馬迎天風
千山萬山江之東
秋飈一夜起大壑
白雲無數吹晴空
幽人石路贈瑤草
楚臣江上愁青楓
高歌明月聽湘瑟
斗酒寒霜飛塞鴻
王孫何事不歸去
搖落淮南芳桂叢

牛渚歌

采石磯頭問牛渚
渚上虬螭作人語
賣鮓歲歲泣鮫人

弄珠夜夜悲龍女太真一去雲離離至今秋色天門垂
我行亦有赤犀在明月照君君不知

新安道中

天風吹落千楊柳晴虹萬丈垂鷁首水中亂石怒且待
大者虬螭小蚪蚪六尺榜人雙胡髯直掛孤帆石上走
長風破浪勢若舞崑崙碣石繫兩肘何當駕此去八溟
直至蓬萊酌南斗

山中夜行

明月在天明星稀仙人夜半歌紫薇黃鶴一去無消息
崑崙玄圃將安歸四野寒光透人肌千山蒼翠濕吾衣
下山忽遇天風起一一化作浮雲飛

浙溪曉起

天門不關飛早霜晶晶水簾浮日光水面雲華濕不起
魚龍吹沫穿石梁波間石苔綠於髮裊裊漾之千尺長
微風千里湛空碧孤槎疑是來瀟湘

嚴州山行

處處青山雲萬重山前駐馬春茸茸手持芳草不知晚
踏破嚴州千萬峰峰頭新月起長笛洞口流泉隨短筇
吾欲金華訪赤松與爾雲外騎雙龍

月夜

嚴州城南秋雨繁嚴州城外波濤喧兩岸人家住楓橘
千門秋色分蘭蓀楚臣正愛薜荔佩秦人莫愛桃花源
相逢今夜開斗酌千山蒼翠流空樽醉來高卧明月裏
猶有白雲來候門

山行

大江以南山作野客子況復愛山者日日山巔弄流泉
百丈銀河向人瀉蒼龍翠虬滿山立近之迺是梧與檟
惟石千尋聳欲墮往往游人下駐馬

真州夜泊

江頭明月白浩浩江上行人怨芳草長波風急龍卧遲
遠塞霜飛鴻到早誰家砧杵衣正單十里芙蓉秋未老
玉人吹簫向何處扁舟愁絕廣陵道

寄懷長安舊游

殘春匹馬辭建章
天南冀北遙相望
游子衣裳滯江雨
故人劍珮銷寒霜
王程忽訝芳草暮
客心有似浮雲長
安得雙鴻起天際
相思寄爾明月璫

期黃山人不至

誰其蘭佩三十秋
華髮蕭然卧滄洲
晴霞常護釣者石
明月買斷長江流
白露泠泠下梧楸
美人不來生我愁
一曲樵歌起天末
白雲搖落萬山頭

湖上行

湖上人家開夕陽
湖南漁者歌滄浪
蒹葭一雨遠江白
楊柳千條秋浦長
松逕夜掃遲幽客
石門高啓流玄霜
天末浮雲莽不止
慎勿蔽此明月光

宗子相集卷五